

Rangatahi Futures

Tō tātou wāhi ki te ōhanga

Kupu whakataki

Mai rā anō e kaha whai wāhi mai ana te Māori ki te ōhanga. I te ūnga mai ki Aotearoa nei ka kawea tahitia e rātou hei hoa haere ngā pūkenga me ngā mōhiotanga o ō rātou tūpuna, ā rātou anō rawa pēnei i te kurī, te kioire me te kūmara. Ko te tikanga noho ringaora ai ngā iwi, ka unu i te hua nui rawa ka taea i ngā rauemi hou me ngā arawātea i reira kia whakapūmautia ai te kātū noho e pai ana mō ō rātou whānau, hapori hoki i Aotearoa. I āhukahuka rātou i ngā pūkenga ahurei me ngā rawa o tēnā rohe ā-iwi, ō tēnā rohe ā-iwi, ka tauhokohoko i te pounamu, te tūhua me te pakohe hei hanga i ngā taputapu e hiahiatia ana kia taurikura ai.

I te taenga mai o te tangata pora ka tīmata te Māori ki te tauhokohoko i te harakeke, te rākau mō ngā rawa Pākehā pēnei i te nēra me te kākahu. I kaha whirinaki ētahi Pākehā ki ngā kai i whakaratongia ai e te iwi o te takiwā, ā, kua kore rātou e ora me i kāhore e āhei ki aua kai a te iwi. I noho te Māori hei rangatira o ētahi teihana patu tohorā, o ētahi mira harakeke me ētahi māra huawhenua, me te aha ka kaha ā rātou mahi tauhokohoko ki ngā Pākehā i ērā tau tuatahi o te taipūwhenua. Ka whakarato te ngohe kōmaka kāri i Ngā pakihi o mua i ētahi tauira o ngā pūkenga whai uara o te Māori me ngā momo pakihi i uaratia ai e rātou, ā, tērā pea mā ētahi rangatahi e hiahia kia nui ake te torotoro i ērā.

E haere tonu ana te whai wāhitanga hira a ngā pakihi Māori ki tō Aotearoa ōhanga o nāianei mā te huhua noa o ngā ahumahi, taea noatia ngā mahi pāmu, te hī ika, te ahurākau, te whakarato pūngao, ngā mahi tāpoi me te hangarau matihiko. Whakaata ai ngā matawhānui me ngā uara o te maha o ngā pakihi ā-iwi me ngā pakihi Māori anō i tō rātou hononga me te takohanga ki te whenua, ō rātou iwi me ngā hapori. Ka haere tonu tā te Māori whai i te tino painga ka taea i ngā arawātea kei mua i a rātou i te ōhanga o Aotearoa i tēnei wā.

Ko te koronga o Te ao ōhanga Māori he taunaki i te rangatahi kia tautuhia ngā arawātea aramahi e wātea ana ki a rātou i te rāngai pakihi, me te huritao ki te pānga o te aramahi nā rātou i kōwhiri ki ō rātou ake whānau, hapū, iwi me te hapori. Kei te whakatenatenatia rātou kia kōkiri i ō rātou anō aramahi i te rāngai kua kōwhiri rātou ka taea ai tō rātou tū kaha i roto i te ōhanga o Aotearoa.